

教育廣播電臺「巷仔口的臺語」錄音文字稿集數別:12

呼應閩語典之俗語:108 歹瓜厚子，歹人厚言語；149 好歹在心內，喙脣皮相款待；176 囡仔人有耳無喙。

錄音日期:

預計播放日期:

安住:各位聽眾朋友逐家好，我是安住老師，歡迎收聽教育廣播電臺「巷仔口的臺語」。

阿如:各位聽眾朋友逐家好，我是阿如。歡迎收聽「巷仔口的臺語」。

安住:阿如，咱昨昏有講著「心歹無人知，喙歹上厲害」這句俗語，今仔日想欲繼續介紹俗講話有關的內容。阿如，你敢會當講幾句仔來予聽眾朋友聽看覓?

阿如:安住老師，我共你講喔，若欲講俗語，著愛對阮阿母罵我的話來講起。細漢我若厚話，阿母就講:「歹瓜厚子，歹人厚言語」，叫我莫傷啼，橫直「加食無滋味，加話毋值錢」，叫我「加食飯，減講話」，尤其是毋通烏白傳話，因為「寄物會減，寄話會加」，有時甚至會「生言造語，無刀殺人」。

安住:阿如，聽起來恁阿母不止仔嚴肅，其實伊是向望你莫烏白講話，較袂惹是非。以早的農業社會，爸母較有權威，攞共囡仔教講:「囡仔人有耳無喙」，就是教囡仔人愛聽序大人的話，較莫發表家己的看法，按呢較袂出代誌，莫怪才會有「歹瓜厚子，歹人厚言語」、「加食無滋味，加話毋值錢」遮的俗語。論真來講，時代已經無全矣，現代教育的觀念愛教育囡仔會當有結構、有組織，共家己的想法、看法清楚共講予出來，有時閣愛會當替家己的看法來做辯護，毋才會講:「一喙水，二風水」、「魚食溪水，人食喙水」，家長、老師愛加強訓練囡仔的口才毋才著。佇遮我嘛有一寡講話的銳角，會當提來俗聽眾朋友分享，像講「好話加減講，歹話莫出喙」，捷講好話，會予咱好人緣，加一个朋友，就會當加一條路；上驚是「好話無出門，歹話脹破腹肚腸」，講話亂使來，按呢就會得失人，得失一个人，敢若佇成功的路裡加一堵壁來共你擋路；「好歹在心內，喙脣皮相款待」，就算你心內無歡喜，猶毋過講出來的話嘛袂當傷超過，愛會記得:「人情留一線，日後好相看」。

阿如:「人情留一線，日後好相看」，是叫咱做代誌、講話毋通傷過絕情，我嘛捌聽過:「你讓人有步，就是予家己有路」，你這馬讓人，有可能佇後擺替家己留一條活路；「好話加減講，歹話莫出喙」是愛加講寡呵咾、肯定、感謝的好話，傷害別人的話就千萬毋通講出喙，總講一句，存好心、講好話、做好代，變好人就著啊。安住老師，講話的銳角敢閣有別項?

安住:我閣想一下，啊!有啦，像講:「講話中人聽，較好大細聲」，講話的內容愛考慮對方的立場、愛有同理心，按呢講出來的話，人才會俗意聽。若無，干焦大細聲嚷，人是無咧共你信篤。另外，「一言不中，千言無用」，講話愛掠重點，若無，講閣較濟，有喙講甲無瀾也是加了工的。

阿如:安住老師，「講話中人聽，較好大細聲」、「一言不中，千言無用」，這兩句俗語我嘛共記來矣。猶有，我感覺聽有對方欲表達的意思，嘛真重要，千萬毋通「一个講蠶稀，一个講飯篤」，你講我不懂。

安住:就是按呢，「會聽聽話頭，袂聽聽話尾」，會曉聽、勢講話的囡仔，後擺才有出脫。時間的關係，咱就先講到遮，歡迎聽眾朋友，明仔載請繼續收聽咱「巷仔口的臺語」。再會!

阿如:「再會!」